



*Bosna i Hercegovina  
Federacija Bosne i Hercegovine  
Tuzlanski Kanton  
Općina Lukavac  
Općinsko Vijeće*

---

*Lukavac, 07.05.2012. godine*

# ***SLUŽBENI GLASNIK OPĆINE LUKAVAC***



## **S A D R Ž A J 5/12**

### Akti Općinskog vijeća

1. *Odluka o agrotehničkim mjerama zaštite i korištenja poljoprivrednog zemljišta na području općine Lukavac*
2. *Odluka o dopuni Odluke o komunalnom redu*
3. *Odluka o raspisivanju Javnog oglasa za izbor predsjednika i članova Upravnog odbora JP "RAD" Lukavac i teksta Javnog oglasa za izbor predsjednika i članova Upravnog odbora istog*
4. *Rješenje o imenovanju Komisije za izbor predsjednika i članova Upravnog odbora JP "RAD" Lukavac*
5. *Rješenje o razrješenju i imenovanju članova Konsultativnog komiteta za područje općine Lukavac*
6. *Plan upravljanja otpadom za područje općine Lukavac za period 2012-2018.godine*
7. *Zaključak o davanju saglasnosti na Granice građevinskog zemljišta u MZ Berkovica na način kako je to definisano u mikrolokaciji br:02-23-2-679/ 12 od 18.04.2012.godine*
8. *Zaključak o davanju saglasnosti na prijedlog situacije mikrolokacije (kružni tok) rekonstrukcija raskrsnice ul. Lukavačkih brigada, ul. Milerova i Prve ulice u Lukacu broj:02-23-2-680/ 12 od 18.04.2012.godine.*



Bosna i Hercegovina  
Federacija Bosne i Hercegovine  
Tuzlanski kanton  
Općina Lukavac  
Općinsko vijeće

Broj: 01-02-1-674/12  
Lukavac, 03.05.2012. godine

Na osnovu člana 32. Statuta općine Lukavac – Prečišćeni tekst („Službeni glasnik općine Lukavac“, broj: 5/08) i člana 82. stav 4. Zakona o poljoprivrednom zemljištu („Službene novine F BiH“, broj: 52/09 i 27/12), Općinsko vijeće Lukavac na 46. sjednici održanoj dana 26.04.2012. godine, donosi

**ODLUKU**  
*o agrotehničkim mjerama zaštite i korištenja poljoprivrednog zemljišta  
na području općine Lukavac*

**OPĆE ODREDBE**

**Član 1.**

Ovom Odlukom o agrotehničkim mjerama zaštite i korištenja poljoprivrednog zemljišta, na području općine Lukavac (u daljnjem tekstu : Odluka) propisuju se :

- potrebne agrotehničke mjere zaštite poljoprivrednog zemljišta u slučajevima u kojima bi propuštanje tih mjera nanijelo štetu, onemogućilo ili smanjilo poljoprivrednu proizvodnju,
- mjere za uređenje i održavanje poljoprivrednog zemljišta i
- posebne mjere zaštite od požara na poljoprivrednom zemljištu.

**Član 2.**

Poljoprivrednim zemljištem u smislu ove Odluke smatraju se oranice, vrtovi, voćnjaci, vinogradi i livade kao i drugo zemljište koje se može privesti poljoprivrednoj proizvodnji.

Zemljište u građevinskom području i zemljište izvan tog područja, predviđeno prostorno- planskom dokumentacijom Kantona i općine za izgradnju, koristi se kao poljoprivredno zemljište i mora se održavati sposobnim za poljoprivrednu proizvodnju, sve do pribavljanja poljoprivredne saglasnosti, rješenja o promjeni namjene poljoprivrednog zemljišta u nepoljoprivredne svrhe.

**II. AGROTEHNIČKE MJERE**

**Član 3.**

Vlasnici i korisnici poljoprivrednog zemljišta dužni su navedeno zemljište obrađivati u skladu sa agrotehničkim mjerama, ne umanjujući njegovu vrijednost.

Pod agrotehničkim mjerama na poljoprivrednom zemljištu u smislu ove Odluke podrazumijevaju se mjere koje se moraju provoditi, a one su sljedeće :

1. minimalni nivo obrade i održavanja poljoprivrednog zemljišta,
2. sprečavanje zakorovljenosti i obrastanja višegodišnjim raslinjem,
3. suzbijanje biljnih bolesti i štetočina,
4. korištenje i uništavanje biljnih otpadaka,
5. održavanje organske tvari u tlu,
6. održavanje povoljne strukture tla i
7. zaštita od erozije.

## *1. Minimalni nivo obrade i održavanja poljoprivrednog zemljišta*

### *Član 4.*

*Minimalni nivo obrade i održavanja poljoprivrednog zemljišta podrazumijeva provođenje najnužnijih mjera raspoloživom tehnologijom i to posebno :*

- redovno obrađivanje i održavanje poljoprivrednog zemljišta, odnosno krčenje, čišćenje, ravnanje niveliranje terena, te osnovnu i dopunsku obradu tla;*
- održavanje ili poboljšavanje plodnosti tla,*
- održavanje vinograda, voćnjaka i višegodišnjih nasada u dobrom stanju, kao i višegodišnjih kultura podignutih radi zaštite od erozije na tom tlu.*

*U cilju optimalnog korištenja poljoprivrednog zemljišta osnovna i dopunska obrada, kao i drugi radovi na poljoprivrednom zemljištu vrše se standardnom i atestiranom poljoprivrednom mehanizacijom u agrorokovima, kada zemljište nije pretjerano vlažno zbog očuvanja teksture i strukture zemljišta.*

## *2. Sprečavanje zakorovljenosti i obrastanja višegodišnjim raslinjem*

### *Član 5.*

*U svrhu sprječavanja zakorovljenosti i obrastanja zemljišta višegodišnjim raslinjem vlasnici i korisnici poljoprivrednog zemljišta dužni su primjenjivati odgovarajuće agrotehničke mjere obrade tla, te njege usjeva i nasada.*

*Vlasnik susjedne parcele dužan je redovito, posebno u neposrednoj blizini međe, kositi travu i korov, te ukloniti sve biljne ostatke, kako ne bi došlo do ometanja razvoja susjednih kultura.*

### *Član 6.*

*Obavezuju se vlasnici i korisnici poljoprivrednog zemljišta, zbog zaštite zdravlja stanovništva, da unište ambroziju na poljoprivrednim površinama, međama, uz živice.*

### *Član 7.*

*Vlasnici i korisnici poljoprivrednog zemljišta dužni su da u toku vegetacijske sezone, u više navrata, u periodu od aprila do kraja juna prije fenološke faze cvjetanja, pa sve do oktobra, redovno suzbijaju i uništavaju ambroziju primjenom slijedećih mjera:*

- 1) agrotehničkih mjera: obradom zemljišta (oranje, zaoravanje strnjišta, tanjiranje), negom usjeva (okopavanje, međuredno kultiviranje, plijevljenje), uvođenjem i održavanjem plodoređa, pravovremenom sjetvom i prihranom kulture/kultura koje se uzgajaju;*
- 2) mehaničkih mjera: kultivacijom površina (čupanjem, redovnom košnjom, okopavanjem, spaljivanjem uništenog bilja, sjetvom kvalitetne trave čistog sjemena formiranjem gustog i čvrstog pokrova, ustanovljavanjem cvjetnjaka ili sadnjom drveća) i dr.;*
- 3) hemijskih mjera: upotrebom odgovarajućih sredstava za zaštitu bilja - herbicida (selektivnih i neselektivnih-totalnih) koji imaju odobrenje za promet i upotrebu u Federaciji BiH i koji se koriste za suzbijanje ambrozije. Sredstva za zaštitu bilja moraju se upotrebljavati u skladu sa uputstvom za primjenu koje se nalazi priloženo u pakovanju sredstva, strogo vodeći računa o vrsti i namjeni zemljišta na kojem se sredstva primjenjuju (poljoprivredna ili nepoljoprivredna površina), kao i o njihovoj upotrebi na propisanoj udaljenosti od voda, vodotokova, izvorišta voda, jezera i sl., i na način kojim će se osigurati očuvanje kvalitete vode i klase vodotoka.*

## *3. Suzbijanje biljnih bolesti i štetočina*

#### Član 8.

Vlasnici i korisnici U cilju suzbijanja bolesti i štetočina obavezna je primjena zaštitnih sredstava na način određen zakonom, odnosno korištenjem zaštitnih sredstava dozvoljenih osnovnim standardima proizvodnje ekološke poljoprivrede.

Vlasnici i korisnici poljoprivrednog zemljišta dužni su ambalažu od utrošenih sredstava za zaštitu bilja (posebno pesticida) uništiti, odnosno odlagati prema uputama koje su priložene uz ta sredstva zaštite.

#### Član 9.

Vlasnici i korisnici poljoprivrednog zemljišta u cilju sprečavanja onečišćenja poljoprivrednog zemljišta moraju:

- uništiti vegetacijsko-privredni otpad poljoprivrednog porijekla ako je ostavljen na poljoprivrednoj površini u roku od manje od jedne godine i ako nije zaorati (kukuruzovinu) do kraja 4. mjeseca iduće vegetacione godine;
  - poštovati odredbe pozitivnih zakonskih propisa pri određivanju količine, te načina i vremena primjene gnojiva;
  - privredni otpad tj. stajnjak zaorati odmah nakon nanošenja na poljoprivredno zemljište posebno ukoliko je nanijet na poljoprivredno zemljište koje je udaljeno do 400 metara od stambenih objekata naselja;
  - po završetku posla odmah ukloniti s poljoprivrednih površina sve ambalaže od zaštitnih sredstava koja se koriste u poljoprivrednoj proizvodnji, ostale plastične ambalaže koje su ostale od skidanja usjeva, berbe ili obrade zemljišta.
- Zaštita poljoprivrednog zemljišta od onečišćenja provodi se radi omogućavanja proizvodnje zdrave hrane, radi zaštite zdravlja ljudi, životinjskog i biljnog svijeta, nesmetanog korištenja i zaštite čovjekovog životnog okoliša. S time u vezi potiče se primjena metoda ekološke (organske, biološke) poljoprivrede kao agrotehnička mjera zaštite okoliša i poljoprivrednog zemljišta.

#### 4. Korištenje i uništavanje biljnih otpadaka

#### Član 10.

Agrotehničke mjere korištenja i uništavanja biljnih otpadaka, koje su vlasnici i korisnici poljoprivrednog zemljišta dužni koristiti, su sljedeće :

- obavezno uklanjanje biljnih ostataka na poljoprivrednom zemljištu nakon žetve u roku od 15 dana od žetve, te se preporučuje kompostiranje istih na propisan način;
- zaoravanje biljnih ostataka na poljoprivrednim zemljištima nakon žetve ili berbe uz prethodno usitnjavanje biljnih ostataka;
- obavezno uklanjanje suhih biljnih ostataka nakon provedenih agrotehničkih mjera u trajnim nasadima vinograda i voćnjaka i ostalih trajnih nasada do 01. aprila iduće vegetacijske godine;
- obavezno odstranjivanje biljnih ostataka nakon čišćenja kanala, međa i poljskih puteva kao i nakon sječe i čišćenja šuma koje graniče sa poljoprivrednim zemljištima.

Na poljoprivrednom zemljištu zabranjeno je spaljivanje organskih ostataka poslije žetve usjeva.

Spaljivanje i uništavanje biljnog otpada i korova na poljoprivrednom zemljištu može se vršiti samo uz poduzimanje odgovarajućih mjera zaštite od požara u skladu sa zakonom.

Spaljivanje biljnog otpada i korova zabranjeno je u razdoblju od 01. maja do 30. septembra kao i u razdobljima kada je proglašena povećana, velika i vrlo velika opasnost od požara.

## *5. Održavanje organske tvari u tlu*

### *Član 11.*

*Preporučuje se održavanje nivo organske tvari u tlu provođenjem minimalno trogodišnjeg plodoreda prema pravilima struke.*

#### *5.1. Primjena organskih i mineralnih đubriva*

### *Član 12.*

*Organska gnojiva moraju se primjenjivati u skladu sa načelima dobre poljoprivredne prakse, osobinama staništa, stepenu opskrbljenosti poljoprivrednog tla hranjivima, potrebama pojedinih kultura za hranjivima i planiranim prinosima i drugim važećim propisima koji se na njih odnose.*

### *Član 13.*

*Maksimalno dozvoljena količina primjene tečnih organskih gnojiva na poljoprivredno tlo je 40 m<sup>3</sup>/ha/god., a u izvan vegetacijskom razdoblju (oktobar- april) do 20 m<sup>3</sup>/ha. U toku jedne kalendarske godine poljoprivredno gospodarstvo može gnojiti poljoprivredne površine stajskim gnojem do slijedećih graničnih vrijednosti primjene azota:*

- 1. 210 kg/ha azota (N), dozvoljena primjena u početnom četverogodišnjem razdoblju;*
- 2. 170 kg/ha azota (N), dozvoljena primjena nakon isteka četverogodišnjeg razdoblja.*

### *Član 14.*

*Vlasnici i korisnici poljoprivrednog zemljišta ne smiju koristiti tečna gnojiva:*

- 1. na područjima izloženim velikom riziku od zagađenja;*
- 2. na poljoprivrednom tlu zasićenom vodom, pokrivenim snijegom i smrznutom poljoprivrednom tlu;*
- 3. u proizvodnji povrća, jagodastog voća, ljekovitog i krmnog bilja unutar 30 dana prije zriobe i berbe;*
- 4. na travnjacima koji se koriste za ispašu stoke;*
- 5. s gospodarstava na kojima su utvrđene bolesti s uzročnicima otpornim na uslove u gnojišnoj jami;*
- 6. u priobalnom pojasu, uz vodotoke do 10 m udaljenosti, uz stajaće vode do 70 m udaljenosti te na vodozaštitnom području;*
- 7. pomiješane s gradskim muljem, kompostom od gradskog mulja i otpada;*
- 8. na poljoprivrednom zemljištu bez zelenog pokrivača.*

### *Član 15.*

*Vlasnici i korisnici poljoprivrednog zemljišta otpad biljnog porijekla, organski otpad koji nije životinjskog porijekla, organski kuhinjski otpad mogu koristiti u vlastitim vrtovima ako je namijenjen za poljoprivrednu proizvodnju za vlastite potrebe i iako se koristi na istom mjestu gdje je i proizveden.*

### *Član 16.*

*Mineralna gnojiva vlasnici i korisnici poljoprivrednog zemljišta moraju primjenjivati u skladu sa načelima dobre poljoprivredne prakse, osobinama staništa, stepenu opskrbljenosti staništa, stepenu opskrbljenosti poljoprivrednog tla hranjivima, potrebama pojedinih kultura za hranjivima i planiranim prinosima, te u skladu s dozvolom za stavljanje u promet i drugim važećim propisima koji se na njih odnose. Mineralno gnojivo se smatra onečišćenim kada sadrži više od 40 mg Cd/kg P<sub>2</sub>O<sub>5</sub>.*

#### *Član 17.*

*Upotreba mineralnih gnojiva se mora zasnivati na stanju osiguranosti tla sa potrebnim hranjivima .*

*U cilju racionalnog korištenja mineralnih gnojiva potrebno je vršiti kontrolu plodnosti tla.*

*Vlasnici i korisnici poljoprivrednog zemljišta ovu mjeru mogu sprovoditi svake treće godine.*

#### *Član 18.*

*Vlasnicima i korisnicima poljoprivrednog zemljišta na udaljenosti 200 m od vodocrpilišta zabranjuje se bilo kakva gnojidba organskim ili mineralnim gnojivima i preoravanje travnjaka.*

### *6. Održavanje povoljne strukture tla*

#### *Član 19.*

*Korištenje mehanizacije na poljoprivrednim zemljištima mora biti primjereno stanju i svojstvima zemljišta tako da se u uvjetima mokrog i vodom natopljenog zemljišta preporučuje izbjegavanje obrade i provoza mehanizacije.*

### *7. Zaštita od erozije*

#### *Član 20.*

*U svrhu zaštite poljoprivrednog zemljišta od erozije određuju se slijedeće mjere :*

- ograničenje ili potpuna zabrana sječe dugogodišnjih nasada, osim sječe iz agrotehničkih razloga;*
- zabrana preoravanja livada, pašnjaka i neobrađenih površina na strmim zemljištima i njihovo pretvaranje u oranice s jednogodišnjim kulturama;*
- zabrana skidanja humusnog, odnosno oraničnog sloja površine poljoprivrednog zemljišta;*
- zatravljanje i sadnja višegodišnjih kultura na strmom zemljištu sa nagibom većim do 25%;*
- zabrana uzgoja jednogodišnjih kultura, odnosno obaveza sadnje dugogodišnjih nasada i višegodišnjih kultura.*

*Pored navedenih mjera potrebno je da vlasnici i korisnici poljoprivredno zemljište zaštite od erozije primjenjujući i slijedeće mjere za:*

- zemljište inklinacije od 1-3% - uređenje vodnog režima, konturnu sadnju i obradu, uvođenje banketa i plodoreda;*
- zemljište inklinacije od 3-7% - poboljšanje vodnih osobina, redovnu gnojidbu, uvođenje banketa i travnih pojaseva;*
- zemljište inklinacije od 7-9% - uređenje vodnog režima, plodored, redovna gnojidba, postepeno uvođenje konturih stepenastih terasa;*
- zemljište inklinacije preko 9% - obrada zemljišta po izohipsama i uvođenje konturih stepenastih terasa.*

*Vlasnici i korisnici poljoprivrednog zemljišta dužni su održavati dugogodišnje nasade i višegodišnje kulture podignute radi zaštite erozije na tom zemljištu.*

## *III. MJERE ZA UREĐIVANJE I ODRŽAVANJE POLJOPRIVREDNOG ZEMLJIŠTA*

#### *Član 21.*

*Zabranjeno je svako pošumljavanje poljoprivrednog zemljišta iz člana 2. stav 1. ove Odluke, a također se zabranjuje nasipanje poljoprivrednog zemljišta građevinskim otpadom i drugim materijalom.*

*Mjere za uređivanje i održavanje poljoprivrednog zemljišta su :*

- 1. održavanje živica i međa,*



2. održavanje poljskih puteva,
3. uređivanje i održavanje kanala,
4. sprečavanje zasjenjivanja susjednih čestica i
5. sadnja i održavanje vjetrozaštitnih pojasa.

Održavanje živica i međa

#### Član 22.

Vlasnici i korisnici poljoprivrednog zemljišta dužni su održavati i uređivati živice na svom zemljištu na način da spriječe njihovo širenje na susjedno obradivo zemljište i puteve, zasjenjivanje susjednih parcela, te da spriječe njenu zakorovljenost. Obaveza vlasnika je formiranje živice na način da se ne ometa promet, vidljivost i preglednost poljskih puteva.

Živice uz poljske puteve i međe mogu se zasaditi najmanje 40 cm od ruba poljskog puta odnosno međe i ne mogu biti šire od 40 cm, te se u svrhu sprječavanja zasjenjivanja susjednih parcela moraju obrezivati tako da njihova visina ne prelazi 1 m.

#### Član 23.

Vlasnici i korisnici poljoprivrednog zemljišta dužni su održavati međe tako da budu vidljivo označene, očišćene od korova i višegodišnjeg rastinja, te da ne ometaju provođenje agrotehničkih mjera na susjednim parcelama.

### 2. Održavanje poljskih puteva

#### Član 24.

Vlasnici i korisnici poljoprivrednog zemljišta dužni su zajednički brinuti o održavanju poljskih puteva koje koriste. Poljske puteve u privatnom vlasništvu uređuju i održavaju njihovi vlasnici.

#### Član 25.

Pod održavanjem poljskih puteva smatra se naročito :

- nasipanje odgovarajućim materijalom (kameni agregat, šljunak i sl.)
- čišćenje i održavanje graba i jaraka uz poljske puteve,
- čišćenje i održavanje cijevnih propusta,
- održavanje živica i drugog raslinja uz poljske puteve,
- sječa pojedinih stabala, grmlja ili grana koje sprječavaju korištenje poljskog puta i
- sprječavanje oštećenja ili uzurpacije puteva.

#### Član 26.

Zabranjuju se sve radnje koje mogu dovesti do uništavanja poljskih puteva, a naročito:

- preoravanje poljskih puteva,
- sužavanje poljskih putova preoravanjem,
- uništavanje zelenog pojasa uz poljske puteve,
- nanošenje zemlje i raslinja na poljske puteve prilikom obrađivanja zemljišta.

#### Član 27.

Obavezuju se vlasnici i korisnici poljoprivrednog zemljišta da saniraju poljski put o svom trošku ako su ga oštetili određenim radnjama.

Poljski put je također potrebno očistiti od eventualnog nanosa zemlje, biljnog otpada ili raslinja prilikom obrade zemljišta.

#### *Član 28.*

*Vlasnici i korisnici poljoprivrednog zemljišta imaju zakonom ustanovljenu služnost prolaza zbog prilaza poljoprivrednim parcelama u svrhu njihove obrade i ako je prolaz nužan.*

*Služnost prolaza traje dok poljski radovi ne budu završeni (oranje, sjetva, žetva, berba i drugi poslovi).*

*Sezonsku služnost, procjenu štete i visinu naknade određuje općinski organ na osnovu propisa o izvlaštenju, dok naknadu štete vrši korisnik sezonske služnosti.*

*Žalba protiv odluke općinskog organa ne zadržava izvršenje odluke.*

#### *Član 29.*

*Vlasnici i korisnici poljoprivrednog zemljišta moraju dozvoliti pristup na svoja zemljišta radnicima poljoprivrednih, geodetskih, geoloških, vodoprivrednih i drugih organizacija koje vrše radove (mjerenje, snimanje, projektovanje, obilježavanje) u vezi sa pripremom i izvođenjem agrarnih operacija i djelovanjem, kao i održavanje melioracijskih objekata i uređaja, ali vlasnici i korisnici poljoprivrednog zemljišta imaju pravo na nadoknadu prouzrokovane štete.*

*Općinski organ može ustanoviti stvarnu služnost oticanja vode preko tuđeg zemljišta, ako se oticanje ne može riješiti na drugi način.*

*Sezonsku služnost, procjenu štete i visinu naknade usljed oticanja vode preko zemljišta određuje općinski organ, a naknadu štete vrši korisnik sezonske služnosti.*

### *3. Uređivanje i održavanje kanala*

#### *Član 30.*

*Vlasnici i korisnici poljoprivrednog zemljišta dužni su održavati i čistiti prirodno stvorene ili izgrađene kanale, tako da se spriječi odronjavanje zemlje, zarastanje korovima i raslinjem, odnosno da se omogući prirodni tok oborinskih voda.*

*Zabranjuje se svako zatrpavanje kanala osim u slučajevima kada se to radi na osnovu projektne dokumentacije i valjane dozvole nadležnih organa koju je pribavio vlasnik odnosno korisnik poljoprivrednog zemljišta.*

### *4. Sprečavanje zasjenjivanja susjednih čestica*

#### *Član 31.*

*Vlasnici i korisnici poljoprivrednog zemljišta ne smiju sadnjom voćaka ili drugih visoko rastućih kultura zasjeniti susjedne parcele, te time onemogućiti ili otežati poljoprivrednu proizvodnju na tim parcelama.*

*Pojedinačna stabla i trajni nasadi sade se na način da ne nanose štetu susjednim česticama zasjenjivanjem, primjereno odmaknuta od međe, odnosno moraju se saditi na razdaljini od tri metra od međe susjedne parcele. Zabranjuje se sadnja visokog raslinja neposredno uz među. Vlasnici i korisnici poljoprivrednog zemljišta postojeća stabla u ogradama u međi moraju održavati tako da grane drveća redovno orezuju da ne bi zasjenjivale susjednu parcelu, kao održavati i sprječavati rast žila i korijenja u susjednu parcelu.*

*Za štetu koju su susjednoj nekretnini prouzročile žile, korijenje ili grane tuđega drveća, a što se ne bi dogodilo da je njihov vlasnik postupao dovoljno obzirno, vlasnik susjednoga zemljišta ima pravo tražiti naknadu. Naknadu štete vlasniku nadoknađuje vlasnik ili korisnik poljoprivrednog zemljišta na čijem se zemljištu nalazi drveće koje nije održavao u skladu sa odredbama ovog člana u iznosu koji utvrde sporazumno, a ako se ne postigne sporazum, visinu naknade određuje nadležni sud.*

## *5. Sadnja i održavanje vjetrozaštitnih pojasa*

### *Član 32.*

*Vlasnicima i korisnicima poljoprivrednog zemljišta utvrđuje se obaveza sadnje vjetrozaštitnih pojaseva na područjima na kojima je zbog izloženosti vjetru većeg intenziteta ili duljeg trajanja poljoprivredna proizvodnja otežana ili smanjena. To su poljoprivredna zemljišta koja se nalaze uz saobraćajnice, vodotoke, kanale, zemljišta sa nagibima od 10% do 25%, kao i ostala zemljišta na kojima je otežana ili smanjena poljoprivredna proizvodnja usljed djelovanja vjetra. Vjetrozaštitni pojas može se izvesti sadnjom živice ili drugih dugogodišnjih visokih nasada, a vlasnik ih je dužan primjereno održavati.*

*Vjetrozaštitni pojasi uz saobraćajnice formiraju se na udaljenosti od vanjskog ruba zemljišnog pojasa tako da je u pravilu širok sa svake strane:*

- brze ceste      30 m,*
- magistralne ceste      20 m,*
- regionalne ceste      10 m,*
- lokalne ceste      5 m.*

*Živicu, grmlje i krošnje drveća koje se nalazi na zemljišnom pojasu treba održavati u skladu sa hortikulturnom tehnologijom tako da ne zaklanjaju prometnu signalizaciju, ne umanjuju preglednost ceste, ne ulaze u gabarit ceste, odnosno da svojim položajem i stanjem ne ugrožavaju sigurnost prometa.*

*Vjetrozaštitni pojasi uz vodotoke formiraju se na udaljenosti većoj od 10 metara od nožice nasipa.*

*Vjetrozaštitni pojasi uz kanale za odvodnjavanje atmosferskih voda formiraju se na najmanjoj udaljenosti do jednog metra od kanala.*

*Na zemljištima sa nagibima od 10% do 25% vjetrozaštitne pojaseve formirati na način kako je to navedeno u članu 31. stav 2. ove Odluke i to okomitom sadnjom u odnosu na pravac dejstva dominantnog vjetra na poljoprivrednom zemljištu vlasnika i korisnika.*

*Na ostalom zemljištu vjetrozaštitne pojase formirati okomito u odnosu na pravac dejstva dominantnog vjetra, a u skladu sa ostalim mjerama propisanim u ovoj Odluci.*

## *IV. POSEBNE MJERE ZAŠTITA OD POŽARA*

### *Član 33.*

*Posebnim mjerama zaštite od požara na poljoprivrednom zemljištu, u smislu ove Odluke smatraju se mjere koje se moraju provoditi u cilju sprečavanja pojava i širenja požara. Stoga su vlasnici i korisnici dužni poduzeti slijedeće mjere :*

- održavati, uređivati i čistiti međe, živice, kanale te poljske i šumske puteve,*
- uklanjanje suhe biljne ostatke nakon provedenih agrotehničkih mjera, a najkasnije do 1. aprila tekuće godine,*
- sprječavati zatravljanje i obrastanje zemljišta višegodišnjim korovima i raslinjem,*
- nakon sječe i čišćenja šume ostatke sakupljati na ravnomjerno raspoređene hrpe ili redove.*

### *Član 34.*

*Biljne ostatke zabranjeno je spaljivati na otvorenom prostoru u periodu od 1. maja do 30. septembra tekuće godine. Spaljivanje se može obavljati u preostalom dijelu godine za mirna vremena, a zabranjuje se spaljivanje za vrijeme vjetrovitog vremena.*

### *Član 35.*

*Za uništavanje korova i biljnog otpada spaljivanjem vlasnici i korisnici poljoprivrednog zemljišta dužni su poduzeti slijedeće mjere :*

- obavijestiti nadležno Vatrogasno društvo općine Lukavac o mjestu i vremenu spaljivanja,
- spaljivanje obavljati na dijelu zemljišta koje je sigurno u smislu ne širenja vatre te da površina na kojoj se vrši spaljivanje bude očišćena od trave i drugog gorivog materijala,
- spaljivanju moraju biti prisutne osobe koje vrše spaljivanje i to od zapaljenja vatre do njenog potpunog sagorijevanja, a po potrebi i procjeni biti će prisutni i vatrogasci, nakon čega se obavezno pregledava mjesto loženja te je potrebno ostatke sagorijevanja u potpunosti pogasiti vodom,
- prilikom spaljivanja potrebno je raspolagati osnovnom opremom za gašenje požara (lopata, kanta napunjena vodom i sl.).

## V. NADZOR

### Član 36.

Nadzor nad provedbom odredbi ove Odluke vrši Služba za opću upravu, privredu i društvene djelatnosti.

## VI. KAZNENE ODREDBE

### Član 37.

Pravno lice kaznit će se novčanom kaznom u iznosu od 5.000,00 KM do 10.000,00 KM ako ne provodi propisane agrotehničke mjere.

Odgovorno lice u pravnom licu kaznit će se novčanom kaznom u iznosu od 500,00 KM do 2.000,00 KM ako ne provodi propisane agrotehničke mjere.

Pojedinac, fizičko lice, kaznit će se novčanom kaznom u iznosu od 500,00 KM do 1.500,00 KM ako ne provodi propisane agrotehničke mjere.

## VII. PRIJELAZNE I ZAVRŠNE ODREDBE

### Član 38.

Ova Odluka stupa na snagu danom objavljivanja "Službenom glasniku Općine Lukavac".

PREDSEDAVAJUĆI  
OPĆINSKOG VIJEĆA

Suljo Suljević. prof. soc.s.r.



*Bosna i Hercegovina  
Federacija Bosne i Hercegovine  
Tuzlanski kanton  
Općina Lukavac  
Općinsko vijeće*

---

*Broj : 01-02-1-706/12  
Lukavac, 03.05.2012.godine*

*Na osnovu člana 44. stav 2. Zakona o komunalnim djelatnostima ( „Službene novine TK“, broj 11/05. i 7/07. ) i člana 32. Statuta općine Lukavac – prečišćeni tekst ( „Službeni glasnik općine Lukavac“, broj 5/08. ), Općinsko vijeće Lukavac je na 46. redovnoj sjednici održanoj dana 26.04.2012. godine, donijelo*

**O D L U K U**  
*o dopuni Odluke o komunalnom redu*

**Član 1.**

*(1) U Odluci o komunalnom redu ( „Službeni glasnik općine Lukavac“, broj 6/09. ) u članu 41. dodaje se novi stav 2. i glasi :*

*„ Podnosioci zahtjeva ( privremeni korisnici javne površine ) za privremeno zauzimanje javne površine dužni su od nadležne općinske službe za opću upravu pribaviti odgovarajuće odobrenje za obavljanje djelatnosti za koju traže privremeno zauzimanje javne površine.“*

*(2) Dosadašnji stav 2. postaje stav 3.*

**Član 2.**

*Ova Odluka stupa na snagu danom objavljivanja u „Službenom glasniku općine Lukavac“.*

**PREDSJEDAVAJUĆI  
OPĆINSKOG VIJEĆA**

*Suljo Suljević, prof.soc.s.r.*



*Bosna i Hercegovina  
Federacija Bosne i Hercegovine  
Tuzlanski kanton  
Općina Lukavac  
Općinsko Vijeće*

---

*Broj:01-02-1-708/12  
Lukavac, 03.05.2012.godine*

*Na osnovu člana 8. Zakona o ministarskim, vladinim i drugim imenovanjima Federacije BiH («Službene novine F BiH», broj 12/03) i člana 3. stav 2. Odluke o utvrđivanju uslova i kriterija za imenovanja na pozicije u regulirane organe («Sl. glasnik općine Lukavac», broj 6/04), Općinsko vijeće Lukavac, na 46. redovnoj sjednici održanoj dana 26.04.2012.godine, donijelo je*

**O D L U K U**  
*o raspisivanju Javnog oglasa za izbor predjednika i članova  
Upravnog odbora JP "RAD" Lukavac*

**Član 1.**

*Ovom Odlukom utvrđuje se potreba raspisivanja Javnog oglasa za popunu upražnjene pozicije predsjednika i članova Upravnog odbora JP "RAD" Lukavac i postupak izbora koji prethodi imenovanju.*

**Član 2.**

*Postupak izbora koji prethodi imenovanju provest će Komisija za izbor, koju imenuje Općinsko vijeće na prijedlog Komisije za izbor, imenovanje i administrativna pitanja.*

*Komisija za izbor, koja se sastoji od pet članova, od kojih su najmanje tri državni službenici, dužna je pregledati pristigle prijave, sačini rang listu uspješnih kandidata te istu ponudi Komisiji za izbor, imenovanje i administrativna pitanja na daljnji postupak.*

**Član 3.**

*Konačno imenovanje predjednika i članova Upravnog odbora javnog preduzeća po provedenom postupku izvršit će Općinsko vijeće.*

**Član 4.**

*Sastavni dio ove Odluke je tekst Javnog oglasa za izbor članova Upravnog odbora JP "RAD" Lukavac.*

**Član 5.**

*Odluka stupa na snagu danom objavljivanja se u «Službenom glasniku općine Lukavac».*

**PREDSJEDAVAJUĆI  
OPĆINSKOG VIJEĆA**

*Suljo Suljević prof.soc.s.r.*



*Bosna i Hercegovina  
Federacija Bosne i Hercegovine  
Tuzlanski kanton  
Općina Lukavac  
Općinsko vijeće*

---

*Broj:01-05-535/08  
Lukavac, 03.05.2012.godine*

*Na osnovu člana 35. Statuta općine Lukavac – prečišćeni tekst („Službeni glasnik općine Lukavac“ broj 5/08), člana 26. Poslovnika o radu Općinskog vijeća Lukavac („Službeni glasnik općine Lukavac“ br. 5/06,2/09 i 5/09), Općinsko vijeće Lukavac na 46. redovnoj sjednici održanoj dana 26.04.2012. godine, donijelo je*

*R J E Š E N J E  
o razrješenju i imenovanju članova Konsultativnog komiteta  
za područje općine Lukavac*

*I*

*Tokić Mustafa se razrješava dužnosti člana Konsultativnog komiteta, a Torić Velid se razrješava dužnosti predsjednika istog.*

*Za nove članove Konsultativnog komiteta se imenuju Suljo Suljević - Predsjedavajući Općinskog vijeća Lukavac, Osmanović Behrem - službenik Policijske stanice Lukavac zadužen za rad sa zajednicom i Enes Gegić - komandir Policijske stanice Lukavac koji će ujedno obavljati i dužnost predsjednika Komiteta.*

*II*

*U Rješenju o imenovanju Konsultativnog komiteta broj:01-05-535/08 od 02.04.2008.godine se pored imena članova Torić Velida i Dare Božić riječ "vijećnik" zamjenjuje riječima "predstavnik građana".*

*III*

*Mandat novoimenovanih članova Komiteta vezan je mandatom saziva Općinskog vijeća.*

*IV*

*Rješenje proizvodi pravno dejstvo danom objavljivanja u "Službenom glasniku općine Lukavac".*

*PREDSJEDAVAJUĆI  
OPĆINSKOG VIJEĆA*

*Suljo Suljević prof.soc .s.r.*



Bosna i Hercegovina  
Federacija Bosne i Hercegovine  
Tuzlanski kanton  
Općina Lukavac  
Općinsko vijeće

---

Broj:01-05-707/12  
Lukavac, 03.05.2012.godine

Na osnovu člana 105. Statuta općine Lukavac– prečišćeni tekst („Službeni glasnik općine Lukavac“, broj 5/08) i člana 2. Odluke o raspisivanju Javnog oglasa za izbor članova Upravnog odbora JP “RAD” Lukavac (“Službeni glasnik općine Lukavac”, broj:5/12) Općinsko vijeće Lukavac na 46. sjednici održanoj dana 26.04.2012. godine, donijelo je

**R J E Š E N J E**  
o imenovanju članova Komisije za izbor predsjednika i članova  
Upravnog odbora JP “RAD” Lukavac

**I**

U sastav Komisije za izbor predsjednika i članova Upravnog odbora JP “RAD” Lukavac izabrani su slijedeći članovi

Edin Hamzić..... predsjednik  
Jasminka Dugonjić ..... član  
Dino Orlić..... član  
Kenan Omerdić..... član  
Alma Džibrić ..... član

**II**

Zadatak Komisije je da pregleda pristigle prijave, obavi intervju sa kandidatima i sačini rang listu, te istu ponudi Komisiji za izbor, imenovanje i administrativna pitanja na daljnji postupak.

**III**

Ovo rješenje proizvodi pravno dejstvo danom objavljivanja u “Službenom glasniku općine Lukavac”.

PREDSJEDAVAJUĆI  
OPĆINSKOG VIJEĆA  
Suljo Suljević prof.soc s.r.





*Bosna i Hercegovina  
Federacija Bosne i Hercegovine  
Tuzlanski kanton  
Općina Lukavac  
Općinsko vijeće*

---

*Broj: 01-02-754-5a/ 12  
Lukavac, 03.05.2012. godine*

*Općinsko vijeće Lukavac, na 46. redovnoj sjednici održanoj dana 26.04.2012. godine., je razmatralo Zahtjev za davanje saglasnosti na korekcije granice građevinskog zemljišta u MZ Berkovica na način kako je to definisano u mikrolokaciji br:02-23-2-679/12 od 18.04.2012.godine, te je u skladu sa članom 105. Statuta općine Lukavac - prečišćeni tekst („Sl. glasnik općine Lukavac“ broj 5/08,), i člana 88. i 95. Poslovnika o radu Općinskog vijeća Lukavac (»Službeni glasnik općine Lukavac «br. 5/06, 2/09 i 5/09) usvojilo slijedeći*

*ZAKLJUČAK*

*Općinsko vijeće daje saglasnost na korekcije građevinskog zemljišta u MZ Berkovica na način kako je to definisano u mikrolokaciji broj: 02-23-2-679/12 od 18.04.2012.godine.*

*Općinsko vijeće traži od Ministarstva poljoprivrede, vodoprivrede i šumarstva, Ministarstva prostornog uređenja i zaštite okoline, Vlade TK-a da u okviru svoje nadležnosti pristupe korekciji granica građevinskog zemljišta u MZ Berkovica na predloženi način.*

*PREDSJEDAVAJUĆI  
OPĆINSKOG VIJEĆA*

*Suljo Suljević prof. soc.s.r.*



*Bosna i Hercegovina  
Federacija Bosne i Hercegovine  
Tuzlanski kanton  
Općina Lukavac  
Općinsko vijeće*

---

*Broj: 01-02-754-5b/ 12  
Lukavac, 03.05.2012.godine*

*Općinsko vijeće Lukavac, na 46. redovnoj sjednici održanoj dana 26.04.2012. godine, je razmatralo Zahjev za davanje saglasnosti na prijedlog situacije mikrolokacije (kružni tok) rekonstrukcija raskrsnice ul. Lukavačkih brigada, ul. Milerova i Prve ulice u Lukavcu broj: 02-23-2-680/ 12 od 18.04.2012.godine, te je u skladu sa članom 105. Statuta općine Lukavac - prečišćeni tekst („Sl. glasnik općine Lukavac“ broj 5/08,), i člana 88. i 95. Poslovnika o radu Općinskog vijeća Lukavac („Službeni glasnik općine Lukavac“ br. 5/06, 2/09 i 5/09) usvojilo slijedeći*

#### *ZAKLJUČAK*

*Općinsko vijeće daje saglasnost na prijedlog situacije mikrolokacije (kružni tok) rekonstrukcija raskrsnice ul. Lukavačkih brigade, ul. Milerova i Prve ulice u Lukavcu broj: 02-23-2-680/ 12 od 18.04.2012.godine.*

*PREDSJEDAVAJUĆI  
OPĆINSKOG VIJEĆA*

*Suljo Suljević prof. soc.s.r.*

*SLUŽBENI GLASNIK OPĆINE  
L U K A V A C*

*Broj: .....5/12*

*Izdaje :.....Općina Lukavac*

*Uređuje.....Stručna Služba Općinskog vijeća*

*Tiraž.....75 primjeraka*

*Adresa.....Općina Lukavac - Općinsko vijeće*

*Telefon - fax:.....553-253*

*Službeni glasnik izdaje se po potrebi*